

Miroslav Lajčák u Briselu sa Ollijem Rehnom i pred Odborom za politička i sigurnosna pitanja



«U Bosni i Hercegovini je ostvaren značajan napredak tokom proteklog mjeseca, ali predstoje važni izazovi kako bi se omogućila tranzicija OHR-a u Ured posebnog predstavnika EU», rekao je danas u Briselu visoki predstavnik i posebni predstavnik EU Miroslav Lajčák u razgovoru sa izaslanikom za proširenje EU Ollijem Rehnom i pred Odborom za politička i sigurnosna pitanja – ključnim tijelom za vanjsku politiku EU.

Sastanak sa Ollijem Rehnom je bio fokusiran na rezultate ovotjednog sastanka Vijeća za provedbu mira i proces integracije BiH u EU, kao i na potrebu brzog i efikasnog provođenja Sporazuma o stabilizaciji i pridruživanju, koji stupa na snagu 1. spnja ove godine.

Prilikom obraćanja Odbora za politička i sigurnosna pitanja, Lajčák je naglasio da je potpisivanje Sporazuma o stabilizaciji i pridruživanju sa EU veliko postignuće i razlog za slavlje. «To je bio prvi put da je Bosna i Hercegovina bila ujedinjena po nekom pitanju kroz potporu svih njenih političara i konstitutivnih naroda. Taj dan bi trebao i dalje da obilježava početak nove ere u istoriji i politici BiH», izjavio je Lajčák.

Samo tijekom proteklog mjeseca, ostvaren je konkretan napredak u postizanju prihvatljivog i održivog rješenja pitanja vojne imovine, jačanju vladavine zakona i provođenju Konačne arbitražne odluke za Brčko. «Ovo je odlično prema svim standardima, ali to ne znači da smo blizu završetka ovog posla – pred nama se nalaze izazovi», upozorio je visoki predstavnik i posebni predstavnik EU.

Govoreći o nedavnoj EU kampanji u sklopu koje je posjetio 16 gradova širom Bosne i Hercegovine, Lajčák je istakao da postoji dosta jedinstva, zajedničkih bojazni i interesa među građanima, koji se razlikuju od onoga što političari nameću kao teme dnevno-političkog života. «Nacionalno pitanje nikada nije pitanje broj jedan: ali jeste pitanje nezaposlenosti nakon kojeg slijede kriminal i korupcija, budućnost mladih, obrazovanje, liberalizacija viznog režima».

Lajčák je naglasio da mu je velika većina od 3.000 građana koji su aktivno učestvovali u ovoj kampanji rekla da žele europsku budućnost za svoju zemlju. Ovaj stav je potvrdilo i nedavno istraživanje javnog mnjenja, koje je pokazalo da rekordan broj građana – više od 80% – žele da Bosna i Hercegovina postane članica Europske unije.

Veleposlanici Odbora za politička i sigurnosna pitanja su zahvalili posebnom predstavniku EU na njegovim naporima za približavanje BiH Europskoj uniji te su izrazili punu potporu strategiji za tranziciju OHR-a u EUSR koja se zasniva na ispunjavanju ciljeva i uvjeta, kako je navedeno i u posljednjem kominikeu Vijeća za provedbu mira.